

كلمة الافتتاح لحفل التكريم لمناسبة مرور مئة عام على إصدار كتاب النبي

مسا الخير وأهلا وسهلا بالحضور الكريم مرّة ثانية بهل لقاء التكريمي للأديب جبران خليل جبران وتحديدًا لمثوية كتابه النبي.

بمطلع كتابو " الأجنحة المتكسرة" يقول جبران: كنت في الثامنة عشرة من عمري حين فتح الحبّ عيني بأشعته السحرية ولمس قلبي بأنامله النارية..."

أما أنا فكانت بداية تعرّفي عا جبران بعمر ازغر من هيك بكتير لكن من خلال القصة نفسا " الأجنحة المتكسرة" لي أدخلتني عالم جبران الواسع واللامحدود. واليوم كاستاذ بهالصرح التعليمي الجامع عم حاول انقل هالشغف لتلاميذي.

ليش جبران؟

كثيرة هي المرات يلي حاولت فيها أكتب وعبر عن جبران لكن أكثر منا هي المرات لي خاني فيها قلمي وعجز انو يحكي ويعبر عن هالأديب لأنني حسيت إنني شو ما قول مش ممكن أوفي حقه. ومين أنا تا احكي وامدح بلسان هالقلم عن جبران يلي تخطى وطنو وصار لكل الدني وصار لبنان وجبران اسمين انحفرو بتاريخ الحضارات البشرية.

ليش كتاب النبي؟

بعد مية سنة عا اصدار هالتحفة الفنية المميزة بأبعادها الانسانية والفلسفية والوجودية، هالكتاب لي ترجم لميات اللغات حول العالم ولي ترك بوجدان كل واحد منا شقفة منو حيننا مرة جديدة بهل ذكرى نسلط الضو على الأهمية الكونية للمضمون لي حطو جبران بين هالاسطر.

مين هي الشعبة الدولية؟

من عشر سنين اي بسنة 2013 تم انشاء هالقسم بمدرسة الليسيه الفرنسيّة لمجموعة من الطلاب يلي بيرغبوا اّو يتعمّقوا بدراسة الأدب واللغة العربية بلبنان وبالعالم العربي. هالطلاب المميزين بثقافتن وحب المعرفة عندن كان علين يمشوا مسيرة ثلاث سنين يبنوا فيها نفسن فكريًا ومعرفيًا ليكونوا علامة مميزة وفارقة بكل مجال رح يفتح قدامن بالمستقبل. وهيك كانوا طلاب نخبة منفتحخ فين وبانجازن. واليوم كمان عم نحتفل معن بمرور عشر سنين على هالتأسيس.

ليش اليوم وليش الليسيه الفرنسيّة اللبنايّة؟

اخترنا بمدرستنا اليوم نكرم نبي جبران مع ضيوف مميزين كتير كل واحد منن بتربطه علاقة خاصة مع جبران وكل واحد منن قديم جبران واعمالو بطريقته الخاصة الابداعية. وتكريم جبران بمدرسة الليسيه هوي تا نقول وبكل وضوح اّو هالصرح العريق كان دايمًا محطة تلاقي فكري وثقافي ومكان حوار حضاري جامع مثل الشعار لي حاملتو رسالتها. وتنقول كمان انو طلابنا لي هني من كل لبنان ومن كل تنوعه الحضاري والفكري والثقافي، بيعرفو جبران، ويبقرو جبران، ويحطلو جبران، ويبكرمو جبران وكل أديب وفنان مثل جبران بيرفع اسم لبنان بالعالي مثل الأرزة الشامخة.

ولانك يا جبران ما كنت انسان عادي بعد 140 سنة عا ذكرى ولادتك و 100 سنة عا تحفتك الرائعة النبي ، بعدك حاضر معنا بكل زاوية بكل مطرح بكل فكرة. وبعدك يا جبران بتطل عا لبنان وتسهر عا ارزتو و شعبو. ورغم انك فليت من زمن بعيد، الموت ما قدر يغلبك لهيك رح اختم كلمتي بقصيدة الشاعر الراحل إيليا أبو شديد يلي بتقول:

ياما مرق عالم قبل منا بهل أرض كانوا ونحن ما كنا

منغيب بكرا مثل ما غابو وناس بيجو وبيسالو عنا

ويلي بيجي بيقول للي غاب هالذني ورشة وترايها كمشة

في تراب باقي تراب وتراب عم يمشي

وانت يا جبران تراب عم يمشي
وشكراً.

هلق رح ننتقل تا نقدملكن مقطع من أغنية المحبة المأخودة من كتاب النبي وغناء السيدة
فيروز من قبل مجموعة من طلابنا بقيادة السيدة شيرين حرب. أداء كلارا واكيم وعزف
هاني بربر والكسندر هندي.

المسرح الكن اتفضلو.

ومن بعد ما استمتعنا بهل المقطع الغنائي الرائع رح ننتقل لنسمع قصيدة رح تلقيها علينا
الطالبة المميزة المتفوقة بالشعبة الدولية اوجنيه توتونجي
اتفضلي اوجنيه كلنا سمع الك.